

Broj: 01-02-961-*11/16*

Sarajevo, 14.11.2016. godine

**SAMOSTALNI SINDIKAT DRŽAVNIH SLUŽBENIKA I NAMJEŠTENIKA U ORGANIMA  
DRŽAVNE SLUŽBE, SUDSKOJ VLASTI I JAVNIM USTANOVAMA U FBiH  
Gosp. Salih Kruščica, predsjednik**

**Predmet: Dostava Kolektivnog ugovora o izmjenama i dopunama Kolektivnog ugovora za  
službenike organa uprave i sudske vlasti u Federaciji Bosne i Hercegovine  
potpisanog 10. 11. 2016. godine**

Poštovani g. Kruščica,

U prilogu Vam dostavljamo jedan primjerak originalnog Kolektivnog ugovora o izmjenama i dopunama Kolektivnog ugovora za službenike organa uprave i sudske vlasti u Federaciji Bosne i Hercegovine, koji je potpisan dana 10. 11. 2016. godine, za vašu arhivu.

Isti je objavljen 11. 11. 2016. godine u "Službenim novinama Federacije BiH", broj 89/16.

Molim Vas da na odgovarajući način prilikom preuzimanja potvrdite primitak navedenog akta.

S poštovanjem,

**DIREKTOR**

  
**Samir Iskrić**

Prilog: Kolektivni ugovor o izmjenama i dopunama Kolektivnog ugovora za službenike organa uprave i sudske vlasti u Federaciji Bosne i Hercegovine od 10. 11. 2016. godine

Na osnovu člana 138. stav (3), a u vezi sa članom 182. Zakona o radu („Službene novine Federacije BiH”, broj: 26/16), Vlada Federacije Bosne i Hercegovine i vlade kantona kao poslodavac s jedne strane i Samostalni sindikat državnih službenika i namještenika u organima državne službe, sudskoj vlasti i javnim ustanovama u Federaciji Bosne i Hercegovine kao reprezentativni sindikat, odnosno, predstavnik državnih službenika i namještenika zaposlenih u organima državne službe, sudskoj vlasti i javnim ustanovama u Federaciji Bosne i Hercegovine, s druge strane, usaglasili su odredbe Kolektivnog ugovora za službenike organa uprave i sudske vlasti u Federaciji Bosne i Hercegovine („Službene novine Federacije BiH”, br. 23/00, 50/00, 97/13 i 18/16) sa odredbama Zakona o radu i drugim pozitivnim zakonskim propisima, te zaključili:

## **KOLEKTIVNI UGOVOR**

### **o izmjenama i dopunama Kolektivnog ugovora za službenike organa uprave i sudske vlasti u Federaciji Bosne i Hercegovine**

#### **Član 1.**

Član 1. Kolektivnog ugovora za službenike organa uprave i sudske vlasti u Federaciji Bosne i Hercegovine („Službene novine Federacije BiH”, br. 23/00, 50/00, 97/13 i 18/16), mijenja se i glasi:

#### **“Član 1.**

Ovim kolektivnim ugovorom uređuju se prava i obaveze državnih službenika i namještenika (u daljem tekstu: državni službenici i namještenici) iz rada i po osnovu rada na koje se primjenjuju propisi o radnim odnosima, plaćama i drugim naknadama državnih službenika i namještenika u federalnim organima državne službe, federalnim ustanovama i drugim federalnim institucijama, kantonalnim organima uprave, upravnim organizacijama i drugim kantonalnim institucijama i gradskim, odnosno, općinskim službama za upravu, (u daljem tekstu: organi državne službe) na teritoriji Federacije Bosne i Hercegovine (u daljem tekstu: Federacija).”

## **Član 2.**

Član 5. mijenja se i glasi:

“Član 5.

Lice koje traži zaposlenje, kao i lice koje se zaposli, ne može biti stavljeno u nepovoljniji položaj s obzirom na spol, spolno opredjeljenje, bračno stanje, porodične obaveze, starost, invalidnost, trudnoću, jezik, vjeru, političko i drugo mišljenje, nacionalnu pripadnost, socijalno porijeklo, imovno stanje, rođenje, rasu, boju kože, članstvo ili nečlanstvo u političkim strankama i sindikatima, zdravstveni status ili neko drugo lično svojstvo.”

## **Član 3.**

Član 9. mijenja se i glasi:

“Član 9.

Stručni kadrovi mogu se primiti na stručno osposobljavanje radi polaganja pripravničkog, odnosno, stručnog ispita i bez zasnivanja radnog odnosa, po postupku i na način koji je zakonom predviđen za pripravnike.

Ugovor o stručnom osposobljavanju bez zasnivanja radnog odnosa zaključuje se u pisanom obliku.

Stručno osposobljavanje bez zasnivanja radnog odnosa može trajati najduže koliko traje pripravnički staž.”

## **Član 4.**

U članu 10., u stavu (2), riječ “stavljanju” zamjenjuje se riječju “prekobrojnosti”, a riječi “na raspolaganje” se brišu.

U stavu (5), riječ “rasporedu” zamjenjuje se riječju “prekobrojnosti”.

## **Član 5.**

U članu 12., stavu (2), prije riječi “nedjelje” dodaje se riječ “subote,”.

## **Član 6.**

U članu 13., stav (1) mijenja se i glasi:

“Godišnji odmor od 20 radnih dana uvećava se prema posebnim osnovama i mjerilima, s tim da ukupno trajanje godišnjeg odmora ne može biti veće od 30 radnih dana.”

Iza stava (1), dodaje se novi stav (2), koji glasi:

“Uvećanje godišnjeg odmora vršit će se prema sljedećim osnovama i mjerilima:”

U tački 2., alineji 1, ispred riječi “službenicima”, dodaje se riječ “državnim”.

U alinejama 2 i 3, riječ "službenicima" zamjenjuje se riječju "namještenicima".

#### **Član 7.**

U članu 20., stavu (1), iza alineje 2, dodaje se nova alineja 3, koja glasi:

"- za sindikalne aktivnosti u trajanju dužem od tri radna dana u mjesecu".

#### **Član 8.**

U nazivu Poglavlja IV., brišu se riječi, "zaštita žene i materinstva".

Nazivi odjeljaka "a) Zaštita zdravlja i sigurnosti na radu" i "b) Zaštita žene i materinstva", se brišu.

#### **Član 9.**

Član 23. mijenja se i glasi:

"Član 23.

Državni službenik i namještenik – žena, odnosno, državni službenik i namještenik - otac djeteta, ima pravo na posebnu zaštitu u skladu sa Zakonom o radu, ako to pitanje nije povoljnije regulirano posebnim zakonom i ako to pravo ne koristi drugi bračni drug."

#### **Član 10.**

U članu 24., stavovi (2) i (3) mijenjaju se i glase:

„Osnovica za obračun plaća utvrđivat će se pregovorima između Vlade FBiH, vlada kantona, gradonačelnika, općinskih načelnika s jedne strane (u daljem tekstu poslodavac) i Sindikata s druge strane, prije usvajanja budžeta za narednu godinu, s tim da se najniža plaća u organima državne službe utvrđuje u visini od 50-70% prosječne neto plaće isplaćene po zaposleniku u FBiH po posljednjem objavljenom statističkom podatku.

U slučaju povećanja indeksa potrošačkih cijena mjerenih od strane Federalnog zavoda za statistiku, većih od 5%, osnovica za utvrđivanje plaća može se utvrđivati i mjesečno."

#### **Član 11.**

U članu 25., stav (1) mijenja se i glasi:

„Plaća državnog službenika ili namještenika obračunata u skladu sa članom 24. ovog ugovora, uvećava se za iznos od 0,4-0,6% za svaku godinu staža osiguranja, s tim da ukupno povećanje plaće po ovom osnovu ne može biti veće od 20%."

## Član 12.

U članu 26., u stavu (2), riječ „carine,” se briše.

Iza stava (2) dodaje se novi stav (3), koji glasi:

„Vlada Federacije će na usaglašeni prijedlog sa Sindikatom pripremiti i u parlamentarnu proceduru uputiti prijedlog zakona kojim će precizno urediti pitanje pojedinačnih radnih mjesta iz stava (1) ovog člana.”

## Član 13.

Član 27. mijenja se i glasi:

„Član 27.

Osnovna plaća uvećat će se za:

- noćni rad – najmanje 25% neto satnice
- prekovremeni rad – najmanje 25% neto satnice
- rad u dane sedmičnog odmora – najmanje 15% neto satnice
- rad u dane praznika koji su po zakonu državni praznici – najmanje 40% neto satnice.

## Član 14.

Član 28., briše se.

## Član 15.

Član 29. mijenja se i glasi:

“Član 29.

Pored naknada na plaću utvrđenih zakonom, državnom službeniku i namješteniku pripada naknada za prijevoz na posao i s posla, ishrana u toku rada (topli obrok), regres za godišnji odmor, naknada za bolovanje, naknada za porodijsko odsustvo, naknada za službeno putovanje, naknada za slučaj povrede na radu, teške bolesti i invalidnosti, naknada za slučaj smrti i pravo na osiguranje od posljedica nesretnog slučaja, otpremnina i naknada za slučaj prekobrojnosti.

Postupak ostvarivanja prava na naknade i visinu naknada iz stava (1) ovog člana utvrđuju nadležna tijela Vlade FBiH, vlada kantona, odnosno, nadležna tijela gradova ili općina svojim propisima, uz konsultacije sa reprezentativnim Sindikatom.”

## Član 16.

U članu 30., iza riječi “prijevoza” dodaju se riječi “čija će visina i način utvrđivanja biti utvrđeni posebnim propisima vlada, gradskih i općinskih vijeća, uz konsultaciju sa reprezentativnim Sindikatom.”, a ostatak teksta se briše.

## **Član 17.**

Član 31. mijenja se i glasi:

“Član 31.

Državnom službeniku i namješteniku pripada naknada za ishranu (topli obrok) u toku rada u neto iznosu od 0,8-1% prosječne neto plaće u FBiH prema posljednjem objavljenom statističkom podatku prije donošenja budžeta, a shodno mogućnostima budžeta.

Visina naknada iz stava (1) ovog člana ne može biti niža od iznosa isplaćenog za juni 2016. godine, odnosno, ne može biti veća od 1% prosječne neto plaće u FBiH prema posljednjem objavljenom statističkom podatku prije donošenja budžeta.”

## **Član 18.**

Član 32. mijenja se i glasi:

“Član 32.

Državnom službeniku ili namješteniku pripada naknada na ime korištenja godišnjeg odmora (regres) u visini od 50% prosječne neto plaće isplaćene u Federaciji prema posljednjem objavljenom statističkom podatku Federalnog zavoda za statistiku.”

## **Član 19.**

Član 33. mijenja se i glasi:

„Član 33.

Državnom službeniku ili namješteniku koji je privremeno raspoređen ili upućen na rad van mjesta prebivališta njegove porodice pripada naknada za odvojeni život od porodice za troškove ishrane u visini i pod uslovima utvrđenim posebnim propisima.”

## **Član 20.**

Član 34. mijenja se i glasi:

„Član 34.

Državnom službeniku ili namješteniku pripada naknada za službeni put (troškovi prijevoza, troškovi prenoćišta i troškovi upotrebe privatnih automobila u službene svrhe) po cijeni prevozne karte i hotelskih računa za hotele do četiri zvjezdice i dnevni troškovi u obliku dnevnice za službeno putovanje na način i u visini utvrđenim posebnim propisima.”

## **Član 21.**

Iza člana 35., dodaju se novi članovi 35a., 35b. i 35c., koji glase:

„Član 35a.

U slučaju povrede na radu, teške bolesti i invalidnosti državnog službenika ili namještenika ili člana njegove uže porodice isplaćuje se jednokratna novčana pomoć u visini od 1-2 prosječne neto plaće isplaćene u FBiH prema zadnjem objavljenom statističkom podatku.

U slučaju smrti državnog službenika, odnosno, namještenika, njegovoj porodici se isplaćuju troškovi sahrane u visini od 2-4 prosječne neto plaće isplaćene u FBiH prema zadnjem objavljenom statističkom podatku.

Članom uže porodice državnog službenika ili namještenika u smislu stava (1) i (2) ovog člana smatraju se: bračni i vanbračni drug ako žive u zajedničkom domaćinstvu; dijete (bračno, vanbračno, usvojeno, pastorče i dijete bez roditelja uzeto na izdržavanje do 18 godina, odnosno, do 26 godina starosti ako se nalazi na redovnom školovanju i nisu u radnom odnosu, a djeca nesposobna za rad, bez obzira na starosnu dob); roditelji (otac, majka, očuh, maćeha i usvojitelji); braća i sestre bez roditelja do 18 godina, odnosno, do 26 godina starosti ako se nalaze na redovnom školovanju i nemaju drugih prihoda, već ih korisnik naknade stvarno izdržava, ili je obaveza njihovog izdržavanja zakonom utvrđena, a ako su nesposobni za rad, bez obzira na starosnu dob, pod uslovom da s njima žive u zajedničkom domaćinstvu i unučad ako nemaju roditelja i žive u zajedničkom domaćinstvu s državnim službenikom ili namještenikom.

Naknada iz stava (2) ovog člana isplaćuje se i u slučaju smrti člana uže porodice državnog službenika ili namještenika.

Ukoliko u organu državne službe istog nivoa vlasti rade dva ili više članova porodice, troškovi sahrane iz stava (2) ovog člana se isplaćuju samo jednom zaposlenom članu porodice.

#### Član 35b.

Državni službenik ili namještenik ima pravo na otpremninu pri odlasku u penziju u visini svojih 3-5 ostvarenih prosječnih neto plaća isplaćenih u prethodnih 5 mjeseci.

#### Član 35c.

Naknada iz člana 35a. i 35b. ne može biti utvrđena u iznosu nižem od iznosa koji se isplaćivao na dan 30. juna 2016."

#### Član 22.

Član 38., briše se.

#### Član 23.

U članu 39., stav (1) mijenja se i glasi:

„Državni službenik ili namještenik, zaposlen na neodređeno vrijeme, a kojem je radni odnos u organu državne službe prestao usljed prekobrojnosti, ima pravo na otpremninu u visini i na način utvrđen propisima o plaćama u organima državne službe.”

#### **Član 24.**

U članu 42., u stavu (1), riječ „smanjenja” zamjenjuje se riječju „promijenjene”.

#### **Član 25.**

U članu 48., stavovi (2) i (3) mijenjaju se i glase:

„Troškovi postupka arbitraže (naknade za rad članova Arbitražnog vijeća), u visini koju zajednički dogovore rukovodilac organa državne službe i predstavnici Sindikata, sporazumno utvrde sa članovima Arbitražnog vijeća, isplaćuju se solidarno iz sredstava Sindikata i sredstava budžeta.

Obavljanje administrativno-tehničkih poslova za Arbitražno vijeće obezbijedit će nadležna ministarstva rada.”

#### **Član 26.**

U članu 55., riječi „u skladu sa” zamjenjuju se riječima „na način propisan”, a iza riječi „zakonom” dodaje se zarez i riječi „pravilima o štrajku”.

#### **Član 27.**

U članu 60., stav (1) mijenja se i glasi:

„Rukovodilac organa državne službe, dužan je omogućiti plaćeno odsustvo sa rada sindikalnom povjereniku i drugom sindikalnom predstavniku zbog obavljanja sindikalnih aktivnosti i zbog prisustva sindikalnim sastancima, kongresima, konferencijama, seminarima, sindikalnim školama, sindikalnim sportskim susretima i drugim oblicima osposobljavanja u zemlji i u inostranstvu u trajanju do tri radna dana mjesečno.”

#### **Član 28.**

U članu 63., stav (1), alineja 2, mijenja se i glasi:

„- ili na drugi način ga staviti u nepovoljniji položaj u odnosu na radno mjesto prije nego što je imenovan na funkciju sindikalnog povjerenika.”

Alineja 3, se briše.

#### **Član 29.**

Član 66. mijenja se i glasi:

„Član 66.

Rukovodilac organa državne službe i predstavnik sindikata dužni su, na zahtjev jedne od strana primiti na razgovor drugu stranu, i razmotriti sva pitanja sindikalne aktivnosti, materijalne i druge problematike državnih službenika ili namještenika, kao i planirane obaveze organa uprave u tom pogledu.”



### **Član 30.**

U članu 67., stavu (1), iza riječi „dužan” dodaju se riječi „na zahtjev sindikata”.

### **Član 31.**

Član 68. mijenja se i glasi:

„Član 68.

U provođenju mjera zaštite na radu, te zaštite prava državnih službenika i namještenika Sindikat ima pravo i obavezu u pogledu:

- učestvovanja u planiranju mjera za unapređenje uslova rada,
- informiranosti o promjenama bitnim za sigurnost i zdravlje zaposlenih,
- osposobljavanja i obrazovanja za obavljanje poslova vezanih za zaštitu na radu,
- pozivanja inspektora zaštite na radu kad za to postoje razlozi,
- traženja od zaposlenih da poštuju mjere zaštite na radu.”

### **Član 32.**

Član 69. mijenja se i glasi:

„Član 69.

Sindikalni povjerenik ili drugo lice koje profesionalno obavlja dužnost u Sindikatu, ima se pravo nakon isteka mandata, ako ponovo ne bude imenovano, vratiti u organ državne službe, na svoje ili drugo radno mjesto za koje ispunjava uslove stručne spreme.”

### **Član 33.**

Član 71. mijenja se i glasi:

“Član 71.

Odredbe ovog ugovora primjenjuju se na sve organe državne službe u Federaciji i sudske vlasti, kantona, gradova i općina, upravne organizacije, kazneno popravne zavode, sudsku policiju, javne ustanove iz oblasti rada i zapošljavanja, penzijsko-invalidskog osiguranja, zavoda zdravstvenog osiguranja i druge javne ustanove na svim nivoima vlasti u Federaciji čija je sindikalna organizacija članica reprezentativnog Samostalnog sindikata državnih službenika i namještenika u organima državne službe, sudske vlasti i javnih ustanova u Federaciji.”

#### **Član 34.**

Član 72. mijenja se i glasi:

„Član 72.

Ovaj kolektivni ugovor zaključuje se na period od jedne godine.

Ukoliko se ovaj kolektivni ugovor ne produži do njegovog isteka, primjenjivat će se 90 dana nakon isteka roka na koji je zaključen.”

#### **Član 35.**

Član 73. mijenja se i glasi:

„Član 73.

Ovaj ugovor smatra se zaključenim kad ga potpišu ovlašteni predstavnici ugovornih strana, a uz prethodno pribavljene pismene saglasnosti vlada kantona za zaključenje ovog kolektivnog ugovora, s tim da je svaki kanton obavezan zatražiti pismenu saglasnost od strane gradonačelnika i općinskih načelnika gradova i općina na području kantona.

Ovaj ugovor je obavezan za strane koje su ga potpisale, kao i za strane koje mu naknadno pristupe.

Ovom ugovoru mogu naknadno pristupiti i drugi organi državne službe i organi sudske vlasti i javne ustanove iz člana 71. ovog ugovora koje prihvataju odredbe ovog ugovora.”

#### **Član 36.**

Član 74. mijenja se i glasi:

„Član 74.

Prijedlog za izmjene i dopune, odnosno, produženje primjene ovog ugovora, mogu dati ispred organa državne službe, sudske vlasti i javnih službi: Vlada Federacije i najmanje 1/3 vlada kantona koje su potpisnici ovog ugovora i Sindikat.

Strana kojoj je podnesen prijedlog iz stava (1) ovog člana mora se pismeno očitovati o istom u roku od 45 dana od dana prijema prijedloga.

Prijedlog za produženje primjene ovog ugovora ne može se podnijeti u posljednjih 45 dana roka iz člana 72. stav (1) ovog ugovora.”

#### **Član 37.**

Član 75. mijenja se i glasi:

„Član 75.

Državni službenici i namještenici iz subjekata iz člana 71. ovog ugovora ostvaruju prava po istom i mogu pred nadležnim sudom zahtijevati njihovu zaštitu.”

#### **Član 38.**

Član 76. mijenja se i glasi:

„Član 76.

Nadležni organi, odnosno, rukovodioci organa državne službe dužni su uskladiti svoje akte koji se odnose na radne odnose, plaće i druge naknade sa odredbama ovog ugovora u roku od 90 dana od dana stupanja na snagu ovog ugovora.

Propis iz člana 26. stav (3) će se uputiti u parlamentarnu proceduru u roku od 60 dana od dana stupanja na snagu ovog ugovora.”

#### **Član 39.**

Član 77. mijenja se i glasi:

„Član 77.

Ovaj kolektivni ugovor objavit će se u službenim glasilima Federacije i kantona.

Troškove objavljivanja ovog ugovora u službenim glasilima snosi Vlada Federacije, odnosno, vlade kantona.”

#### **Član 40.**

Član 78. mijenja se i glasi:

„Član 78.

Ovaj ugovor stupa na snagu narednog dana od dana objavljivanja u službenim glasilima Federacije i kantona.”

#### **Član 41.**

Iza člana 78., dodaju se novi članovi 79. i 80. koji glase:

„Član 79.

U skladu s podjelom nadležnosti utvrđenom Ustavom Federacije, Vlada Federacije i vlade kantona, odnosno, jedinice lokalne samouprave, odgovaraju odvojeno, svaka za svoje finansijske obaveze utvrđene propisima o plaćama i naknadama i ovim kolektivnim ugovorom.

Član 80.

Nakon stupanja na snagu ovog ugovora, Federalno ministarstvo pravde i Sindikat će sačiniti njegov prečišćeni tekst, koji će biti potpisan od strane federalnog ministra pravde i predsjednika Sindikata državnih službenika i namještenika u FBiH kao reprezentativnog Sindikata.”

Za Vlada Federacije Bosne i Hercegovine



Mato Jozić, ministar pravde

Broj: 03-34-249-2/2016  
Datum: 10.11.2016



Za Samostalni sindikat državnih službenika i namještenika u organima državne službe, sudskoj vlasti i javnim ustanovama u FBiH

Saša Kruščica, predsjednik Sindikata

Broj: 01-11-558/16  
Datum: 10.11.2016

Za Kanton Sarajevo

Elmedin Konaković

Broj: 02-34-32602/16  
Datum: 10.11.16

Za Unsko-sanski kanton

Nikola Findrik, ministar pravosuđa i uprave

Broj: 03-40-13820-1/2016  
Datum: 10.11.2016

Za Posavski kanton

Marijan Klaić, premijer

Broj: 01-02-551-1/16  
Datum: 11.11.2016

Za Zeničko-dobojski kanton

Mirnes Bašić, ministar pravde i uprave

Broj: 02-34-17826/16  
Datum: 10.11.2016

Za Bosansko-podrinjski kanton Goražde

Emir Oković, premijer

Broj: 03-34-1520-1/2016  
Datum: 10.11.2016

Za Hercegovačko-neretvanski kanton

Suad Balić, ministar pravosuđa, uprave i lokalne samouprave

Broj: 01-36-2267/16  
Datum: 10.11.2016